

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK ● APRIL, 2026., broj 66.



**PROJEKTI KOJI SU ČEKALI
DECENIJAMA - DANAS
ZAVRŠENI, U TOKU I ZAPOČETI**



Novi projekti

ZAVRŠENI RADOVI NA DOMU ORUŽANIH SNAGA BIH I PREDSTAVLJEN PROJEKAT UREĐENJA TRGA

Načelnik Općine Stari Grad Sarajevo Irfan Čengić i ministar odbrane Bosne i Hercegovine Zukan Helez obišli su završene radove na obnovi Dom Oružanih snaga Bosne i Hercegovine, a tom prilikom predstavljen je i projekat budućeg uređenja trga ispred ovog objekta. Prije obilaska održan je sastanak na kojem je načelnik Čengić ministru Helezu prezentovao idejno rješenje uređenja trga ispred Doma Oružanih snaga BiH, s ciljem da se ovaj prostor dodatno uredi i zajedno sa obnovljenim objektom formira funkcionalna i estetski uređena urbana cjelina u samom centru Sarajeva.



“Nažalost, 30 godina se mnogo pričalo o patriotizmu, a istovremeno se gledalo kako propada jedan od važnih simbola države BiH. Mogao sam govoriti da je ovo objekat u vlasništvu države, da nema konsenzusa zbog blokada na državnom nivou i tražiti izgovore. Umjesto toga, odlučili smo se za rad i konkretna rješenja. Odmah nakon preuzimanja dužnosti načelnika, prezentovao sam ideju obnove Doma Oružanih snaga BiH ministru Helezu”, naglasio je načelnik Čengić. Nakon sastanka upriličen je obilazak objekta na kojem su nedavno finalizirani radovi koji su započeli u januaru prošle godine. Na objektu su izvedeni radovi na obnovi fasade, zamjeni vanjske stolarije, kao i sanaciji krovnog pokrivača. Ukupna vrijednost izvedenih radova iznosila je preko 2 miliona KM, a finansijska sredstva za realizaciju projekta većinski su osigurali Općina Stari Grad Sarajevo i Vlada Federacije Bosne i Hercegovine dok su u finansiranju učestvovali i Vlada Kantona Sarajevo i Grad Sarajevo.



UREĐENJE TRGA SA FONTANOM

Kada je riječ o uređenju trga sa fontanom, načelnik Čengić je naglasio da je prije svega potrebno je da zaživi Odluka o novom sastavu Komisije za nacionalne spomenike BiH, usvojena na prijedlog člana Predsjedništva BiH dr. Denisa Bećirovića, kojom se poništavaju loše odluke iz prošlosti i ponovo uključuju međunarodni članovi u rad Komisije.

Naglašava da postojeći sastav Komisije za nacionalne spomenike BiH godinama ne radi svoj posao i blokira milionske projekte obnove objekata u Starom Gradu, pa je teško očekivati da će blagovremeno dati potrebna mišljenja za ovaj projekat, kao što neradom svjesno blokiraju i brojne druge projekte. Nakon dobijanja mišljenja Komisije, Općina je spremna pristupiti izradi glavnog projekta i započeti radove na izgradnji trga.

U sali unutar objekta nedavno je realizovan i projekat „Konzervacija i restauracija četiri slike“ autora Ismeta Mujezinovića, čime je dodatno očuvana kulturno-historijska vrijednost ovog prostora.




Novi projekti



OTVOREN VRTIĆ „AGAN BOSTANĐIĆ“ NA ŠIROKAĆI, 30 GODINA NAKON RATA

Na Širokaći je 4. marta svečano otvoren obnovljeni vrtić „Agan Bostandžić“, trideset godina nakon što je uništen tokom opsade Sarajeva. Ovim činom, lijeva obala Miljacke u Starom Gradu, prvi put nakon rata, dobija dva javna vrtića, što predstavlja značajan iskorak za porodice i djecu koja ovdje žive. Načelnik Općine Stari Grad Sarajevo, Irfan Čengić, istakao je da je riječ o projektu koji ima duboku simboličku i društvenu vrijednost.



„Drugi su se ovdje slikali i obećavali. Mi smo radili i gradili kako bi naša djeca dobila nazad vrtić koji je uništen u opsadi Sarajeva. Danas svjedočimo konkretnim rezultatima – pros-toru u kojem će odrastati nove generacije“, poručio je načelnik Čengić.

Posebno je naglasio da danas u Kantonu Sarajevo više nema listi čekanja za vrtiće, koje su prije samo šest godina predstavljale ozbiljan problem za mnoge roditelje.

„Nažalost, hiljade djece u drugim kantonima i širom Bosne i Hercegovine i dalje čekaju svoje mjesto u vrtiću. Zato je izuzetno važna kampanja UNICEF-a koja skreće pažnju na potrebu većih ulaganja u predškolski odgoj i ravnomjernu dostupnost vrtića svoj djeci“, dodao je načelnik Čengić.


Ovim povodom, Općina Stari Grad Sarajevo u saradnji sa UNICEF, pripremila je posebnu video poruku našeg reprezentativca Edin Džeko, povodom svečanog otvorenja vrtića.

“Pričati o djeci, znači pričati o budućnosti. A u Bosni i Hercegovini više od 50.000 djece još čeka svoje mjesto u vrtiću. To nije samo brojka – to su prava koji ne mogu čekati.

Zato želim da od srca čestitam svima koji su prepoznali ono najvažnije – da ulaganje u najmlađe nije trošak, već investicija.

Djeci koja će trčati, smijati se i rasti u obnovljenom vrtiću želim puno zdravlja, radosti i prijateljstva. Ulaganje u djecu, ulaganje je u znanje, jednakost i priliku za sve”, naglasio je Dijamant.

Zato vas pozivam – neka nas ovaj lijepi primjer iz Starog Grada podsjeti koliko je važno raditi zajedno, odgovorno i hrabro.



Novi projekti

OMOGUĆENA INVESTICIJA OD 4 MILIONA KM VLADE KATAR U OBJEKAT IZBIH U STAROM GRADU



Općina Stari Grad Sarajevo, u saradnji sa Islamskom zajednicom u Bosni i Hercegovini, uspješno je okončala aktivnosti koje su rezultirale osiguranjem investicije vrijedne oko 4 miliona KM za realizaciju projekta u Starom Gradu.

Riječ je o projektu rekonstrukcije stambeno-poslovnog objekta, uz promjenu njegove namjene u savremeni poslovni objekat, za koji je izdato odobrenje za građenje Islamskoj zajednici u BiH. Događaj je upriličen u prisustvu reisul-uleme Husein-ef. Kavazovića i Nj.E. ambasadora Države Katar Meshala bin Ali Al-Attiyaha.

Pored značajnog investicionog aspekta, realizacijom ovog projekta bit će riješen i dugogodišnji sigurnosni problem, s obzirom na to da je riječ o objektu koji je bio u ruševnom stanju i predstavljao potencijalnu opasnost za građane i saobraćaj.



„Ovo je konkretan rezultat dvogodišnjeg zajedničkog rada Općine i Islamske zajednice. Međunarodna saradnja nam ne donosi samo nova iskustva, nego i konkretne projekte i milionske investicije koje mijenjaju naš Stari Grad“, izjavio je načelnik Čengić.

Tokom susreta sa ambasadorom Katara razgovarano je i o novim projektima i mogućnostima daljeg unapređenja saradnje, posebno u oblastima investicija, turizma i razvoja.

Općina Stari Grad Sarajevo očekuje da će Komisija za nacionalne spomenike BiH u narednom periodu dati potrebna mišljenja za projekte vrijedne više od 10 miliona KM, među kojima su izgradnja bazena na Bentbaši, HUB u ulici Saliha Hadžihuseinovića Muevkitu, hotel IZBiH u bivšoj zgradi Rijaseta, te uređenje trga ispred Doma Oružanih snaga BiH.

Ubrzanje rada Komisije, nakon promjena u njenom sastavu, omogućilo bi realizaciju niza važnih projekata koji će doprinijeti razvoju Starog Grada i kvalitetu života građana.





PRVI PUT SE GRADE STANOVNI ZA MLADE I BORAČKU POPULACIJU U STAROM GRADU

U Općini Stari Grad Sarajevo je 16.02.2026. godine potpisan ugovor o kupoprodaji nekretnine između Općine Stari Grad Sarajevo i Fonda Kantona Sarajevo za izgradnju stanova namijenjenih članovima porodica šehida i poginulih boraca, ratnim vojnim invalidima, demobiliziranim borcima i prognanim osobama. Predmetna nekretnina je u vlasništvu Općine Stari Grad Sarajevo, a prodana je Fondu Kantona Sarajevo po kupoprodajnoj cijeni od 241.870,00 KM.

Ugovor su potpisali načelnik Općine Stari Grad Sarajevo Irfan Čengić i direktor Fonda Kantona Sarajevo Elvedin Lagarija.

„Gradnja stanova od strane države, koji će se prodavati po povoljnijim uslovima, dugoročno je daleko bolje rješenje od subvencioniranja kupovine stanova na tržištu. Zbog toga mi je posebno drago što je po prvi put i Općina Stari Grad Sarajevo uključena u ovakve aktivnosti. Kao historijsko jezgro grada nemamo velike prostorne mogućnosti za masovnu stanogradnju, ali na ovaj način omogućavamo da se i u Starom Gradu grade stanovi dostupni mladima i boračkoj populaciji“, naglasio je načelnik Čengić.

Posebno je istakao da će se projekat realizovati u Mjesnoj zajednici Moščanica, koja bilježi kontinuiran rast broja stanovnika, čime se dodatno jača razvoj ovog dijela općine.

Načelnik je direktoru Fonda predstavio i mogućnost realizacije dodatnog projekta izgradnje pet stambenih objekata, u kojima bi stanovi bili davani u zakup pod povoljnim uslovima, s ciljem rješavanja stambenog pitanja mladih i drugih kategorija stanovništva.

Direktor Fonda Kantona Sarajevo Elvedin Lagarija istakao je da je saradnja s Općinom Stari Grad važan iskorak ka ravnomjernoj realizaciji projekata stanogradnje na području cijelog Kantona Sarajevo, te da će Fond nastaviti ulaganja u projekte koji omogućavaju rješavanje stambenog pitanja boračke populacije i mladih porodica.



Podrška



NASTAVAK OPREMANJA I FINANSIRANJA DVD VRATNIK

Upriličena je posjeta Dobrovoljnom vatrogasnom društvu "Vratnik", gdje je izvršena donacija vrijedne opreme, s obzirom na to da ovo društvo predstavlja važan segment struktura zaštite i spašavanja Općine Stari Grad Sarajevo. Tom prilikom organizovano je i potpisivanje ugovora o dodjeli namjenskih sredstava za realizaciju programskih aktivnosti.

"Milionsko ulaganje u strukture Civilne zaštite je jedan od mojih prioriteta. Do sada smo, u mom mandatu, u opremi i finansijskim sredstvima osigurali oko pola miliona KM za DVD 'Vratnik', a plan nam je do kraja mandata da taj iznos bude oko 1,5 miliona KM. Zahvalan sam pripadnicima DVD 'Vratnik' što decenijama učestvuju u gašenju požara u Starom Gradu", istakao je načelnik Čengić.

Donirana oprema obuhvata savremenu ličnu zaštitnu opremu za vatrogasce, koja uključuje zaštitna odijela, kacige, čizme i rukavice, kao i specijaliziranu tehničku opremu za intervencije poput motornih pila, opreme za rezanje betona i armature, pumpi, agregata te uređaja za gašenje požara. Također su osigurani i dodatni alati i sredstva koja doprinose efikasnijem djelovanju na terenu, posebno u situacijama požara i drugih prirodnih nepogoda. Važno je istaći da je u mandatu načelnika Irfana Čengića u dva navrata vršena nabavka opreme za ovo društvo, uključujući i značajnu donaciju Grada Istanbula, realiziranu kao rezultat međunarodne saradnje Općine. U narednom periodu planirana je i nabavka novog vatrogasnog vozila. Sve navedeno predstavlja najveće opremanje Dobrovoljnog vatrogasnog društva Vratnik u njegovoj historiji. U delegaciji su bili Adela Plakalo, sekretar Općinskog organa uprave, Seid Škaljić, predsjedavajući Općinskog vijeća, te vijećnici Nermin Iković, Muamer Mekić i Selvira Vilić.





OPĆINA NABAVILA NOVO SANITETSKO VOZILO I MEDICINSKU OPREMU ZA DOM ZDRAVLJA STARI GRAD

Dom zdravlja Stari Grad dobio novo sanitetsko vozilo i medicinsku opremu, ispunjeno ranije dato obećanje o nabavci vozila prilagođenog specifičnostima i uskim ulicama Starog Grada.

Načelnik Općine Stari Grad Sarajevo Irfan Čengić zajedno sa ministrom zdravstva Kantona Sarajevo Enisom Hasanovićem posjetio je JU Dom zdravlja Stari Grad Sarajevo, gdje je upriličeno uručenje sanitetskog vozila i vrijedne medicinske opreme.

Dom zdravlja Stari Grad Sarajevo je iskazao potrebu za modernim sanitetskim vozilom koje će dimenzijama biti prilagođeno uskim i strmim ulicama Starog Grada u kojima će imati intervencije. Ovo je sve dio programa milonskih ulaganja u opremanje struktura Civilne zaštite u Starom Gradu.



“Zdravstvo nije nadležnost općina u KS, ali trudimo se ovakvim i sličnim aktivnostima pomoći onima koji jesu nadležni. Moje opredjeljenje jeste jačanje Civilne zaštite, a Dom zdravlja je važna karika u tom sistemu. S ministrom Hasanovićem smo već razgovarali o novim aktivnostima i zajedničkim investicijama u obnovu pojedinih ambulanti i kupovini dodatne medicinske opreme za Dom zdravlja. Također, povodom Svjetskog dana zdravlja imali smo aktivnosti u Centru Generacija koji je najbolji primjer prevencije i pomoći pripadnicima treće životne dobi”, naglasio je načelnik Čengić.

Delegaciju u Domu zdravlja dočekala direktorica Doma zdravlja Amela Brčkalija, a događaju su prisustvovali i predsjedavajući Općinskog vijeća Seid Škaljić, zastupnica u Skupštini Kantona Sarajevo Belma Kapo, kao i vijećnik Željko Ler. Ovom prilikom dobili su i značajnu medicinsku opremu i potrošni materijal, uključujući EKG aparat, kolica za osobe sa invaliditetom, torbe za kućne posjete, instrumente, te neophodna sredstva za svakodnevni rad zdravstvenog osoblja.



Aktuelno



TREĆI EU PROJEKAT ZA STARI GRAD: VRIJEDNOST EVROPSKE PODRŠKE PREMAŠILA 5 MILIONA KM

Općina Stari Grad Sarajevo nastavlja uspješno povlačiti sredstva iz fondova Evropske unije. U okviru aktuelnog mandata realizuje se već treći projekat finansiran iz EU fondova, čime ukupna vrijednost evropske podrške za Stari Grad prelazi 5 miliona KM.

Najnoviji projekat nosi naziv CO-PLACE i realizuje se u okviru programa URBACT, a Općina Stari Grad učestvuje zajedno sa još sedam evropskih gradova i općina iz Belgije, Grčke, Španije, Sjeverne Makedonije, Rumunije, Slovenije i Italije. Tim povodom je održan sastanak sa predstavnicima partnerskog grada Brindisi iz Italije.

Projekat CO-PLACE će se implementirati u naredne dvije i po godine, a njegova ukupna vrijednost iznosi 750.000 eura. Fokus projekta je razmjena iskustava i razvoj modela za korištenje zapuštenih i praznih prostora te njihovu transformaciju u funkcionalne prostore namijenjene zajednici.

Općina Stari Grad već ima konkretne i prepoznatljive primjere ovakvog pristupa, među kojima su Muzej Mersad Berber, Centar za zdravlje "Generacija", HUB za mlade, kao i HUB za poduzetništvo i inovacije, gdje su nekada zapušteni prostori pretvoreni u sadržaje od šireg društvenog značaja.

Pored toga, Općina učestvuje i u realizaciji projekta INSPIRE – Inovativna rješenja za evropske rijeke bez plastike, finansiranog iz programa HORIZON EU, koji se provodi u saradnji s profesorima Poljoprivrednog i Farmaceutskog fakulteta te Sarajevske škole za nauku i tehnologiju (SSST).



IZGRADNJA BIKIKLISTIČKE STAZE

Paralelno s tim, zajedno sa Gradom Sarajevom i općinama Istočnog Sarajeva, privodi se kraju i izgradnja biciklističke staze trasom nekadašnje pruge Čire, projekta koji je godinama bio blokiran, a koji će uskoro postati nova sportsko-turistička atrakcija Sarajeva.

Važan segment evropske podrške predstavlja i višemilionska pomoć domaćinstvima u borbi protiv energetske siromaštva, čime je direktno unaprijeđen kvalitet života velikog broja građana. Općina Stari Grad Sarajevo ostaje posvećena jačanju međunarodnih partnerstava i realizaciji projekata koji doprinose održivom razvoju, kvalitetnijem životu građana i izgradnji moderne, inkluzivne lokalne zajednice.



ZAVRŠENI RADOVI NA SANACIJI DIJELA ULICE MOČILA

Završen su radovi na sanaciji dijela ulice Močila, u okviru projekta uspostave biciklističke staze koju realizuje delagacija Evropske unije. Sanacijom je unaprijeđena putna infrastruktura na ovom lokalitetu, ali i osigurana važna poveznica sa trasom biciklističke staze Stari Grad – Pale.



Zajednička saradnja



POTPISAN SPORAZUM O OBNOVI LOKALNIH CESTA I RAZGOVOR O DRUGIM PROJEKTIMA

U Općini Stari Grad Sarajevo je 11.02.2026. godine potpisan Sporazum o zajedničkom pokretanju postupka javne nabavke za projekat „Rehabilitacija lokalne ceste od interesa za Kanton Sarajevo na području Općine Stari Grad Sarajevo“.

Predmet javne nabavke je rehabilitacija dijela ulica Sagrdžije i Safvet-bega Bašagića, a dio sredstava će izdvojiti Direkcija za ceste Kantona Sarajevo, a dio Općina Stari Grad.

Potpisivanjem ovog sporazuma potvrđena je snažna saradnja između Općine Stari Grad i Ministarstva saobraćaja Kantona Sarajevo.

“Iz godine u godinu nastavljamo kontinuirano ulagati u cestovnu infrastrukturu općine Stari Grad, kroz izgradnju i obnovu saobraćajnica putem naše Direkcije za puteve. Uz nove saobraćajnice, građanima Starog Grada smo vratili i autobuske i minibuske linije koje godinama nisu bile u funkciji. Danas na tim linijama se vozi preko milion putnika. U narednom periodu nastavljamo sa saradnjom i omogućavanjem kvalitetnijeg života čovjeka koji živi u ovoj općini, koja je srce našeg grada i kantona”, kazao je ministar Šteta.

Sporazum su potpisali općinski načelnik Irfan Čengić i direktor Direkcije za ceste Kantona Sarajevo Selmir Kovač, uz prisustvo ministra saobraćaja Kantona Sarajevo Adnana Štete, predsjedavajućeg Seida Škaljića, dopredsjedavajućeg Kerima Smailbegovića, sekretarke Općinskog organa uprave Adele Plakalo, direktora JKP Općine Stari Grad Rusmira Jašarevića te vijećnika Muamera Mekića i Timura Vilića, čija je inicijativa bila uređenje kombi stajališta na početku ulice Safvet-bega Bašagića, kao i uređenje pješačkog dijela te ulice.

“Zahvalni smo ministru na dosadašnjoj podršci kroz koju smo zajednički sanirali šest ulica, realizovali velike milionske projekte rekonstrukcije i izgradnje ceste na Baricama i Bistriku, te započeli radove na regionalnom putu prema Hreši u MZ Mošćanica. Nakon završetka procesa eksproprijacije zemljišta, slijedi priprema za rekonstrukciju nove dionice ove regionalne ceste”, naglasio je načelnik Čengić.



SPORAZUMI ZA NASTAVAK ZAJEDNIČKOG RADA OPĆINE STARI GRAD I GRADA SARAJEVA

Općina Stari Grad Sarajevo i Grad Sarajevo nastavili su snažnu i partnersku saradnju potpisivanjem niza sporazuma o zajedničkoj realizaciji projekata od značaja za razvoj Starog Grada i glavnog grada Bosne i Hercegovine.

“Zahvalan sam gradonačelniku Avdiću i gradskim vijećnicima koji su prepoznali važnost zajedničkog rada na projektima u Starom Gradu, a koji su od značaja za cijeli Grad Sarajevo. Ovo je nastavak dobre saradnje između ove dvije institucije, a najbolji pokazatelji u ovoj godini će biti završeni projekti sanacije Doma oružanih snaga BiH, Muzej “Mersad Berber” i biciklistička staza Sarajevo-Pale. Implementacija ova 3 projekta je u vrijednosti 8 miliona KM sa drugim institucijama”, istakao je načelnik Čengić.

Potpisanim sporazumima osigurana je finansijska podrška za realizaciju sljedećih projekata:

- Sanacija mosta Ćumurija, koji Općina Stari Grad planira realizirati u saradnji sa Direkcijom za ceste Kantona Sarajevo, uz podršku Grada Sarajeva u iznosu od 200.000 KM;
- Uređenje trga u neposrednoj blizini Vijećnice te uspostava pješačke zone u ulici Brodac, projekat vrijedan 150.000 KM, kojim će se dodatno unaprijediti urbani ambijent historijske jezgre grada;
- Uspostava sportsko-rekreativne zone u kasarni Faletići, za što je izdvojeno 100.000 KM, s ciljem stvaranja novih sadržaja za djecu, mlade i sve građane;
- Sufinansiranje sanacije klizišta na lokalitetu Curine njive, u iznosu od 100.000 KM, čime se daje poseban doprinos sigurnosti stanovništva i zaštiti infrastrukture.

Također, potpisani su i aneksi sporazuma za projekte koji su već započeti – rekonstrukciju Carevog mosta, obnovu Bistričke kule te sanaciju fasade objekta budućeg Muzeja Berber – kako bi se osiguralo produženje rokova za njihovu realizaciju.

Sporazume su potpisali načelnik Općine Stari Grad Sarajevo Irfan Čengić i gradonačelnik Grada Sarajeva Samir Avdić.



Zajednička saradnja

POTPISAN MEMORANDUM O SARADNJI NA REALIZACIJI PROJEKTA „ČISTA RIJEKA MILJACKA“

Općina Stari Grad Sarajevo, Grad Sarajevo, Kanton Sarajevo i još tri gradske općine potpisale su Memorandum o saradnji s ciljem unapređenja međusobne koordinacije i zajedničkog djelovanja na realizaciji projekta „Čista rijeka Miljacka“.



VIŠE OD 4 MILIONA KM PRIHODA JKP OSG POTVRĐUJE ISPRAVNOST ODLUKE O UPRAVLJANJU PARKINZIMA

Rezultati poslovanja Javnog komunalnog preduzeća Općine Stari Grad za 2025. godinu najbolji pokazatelj ispravnosti odluke da Općina, umjesto privatnih subjekata, upravlja parkinzima.

Prema zvaničnim podacima, JKP OSG je u 2025. godini ostvario više od 4 miliona KM prihoda, čime se svrstava među rijetka javna preduzeća koja ne traže subvencije, već direktno doprinose punjenju budžeta.

Načelnik Općine Stari Grad Sarajevo Irfan Čengić tim povodom je izjavio: „Više od 4 miliona KM prihoda JKP OSG u 2025. godini najbolji su pokazatelj da je bila ispravna odluka da Općina, umjesto privatnika, upravlja parkinzima.“

Izveštaj o radu preduzeća za parking pokazuje da je vrijedilo izdržati sve napade kojima sam bio izložen i kojima sam i dalje izložen, svjestan da novi tek dolaze. JKP OSG je jedno od rijetkih javnih preduzeća koje puni budžet, a ne traži subvencije. Čestitke direktoru Rusmiru Jašareviću i njegovom timu na ostvarenim rezultatima. Naglasio je da prije nego što pogledate prihode od same garaže, podsjeća da je 2011. godine prijedlog većine SDA-SBiH bio da se zemljište garaže proda za 1,3 miliona KM.

“Vijećnici SDP i NS nisu podržali taj prijedlog, zbog čega nije bilo potrebne dvotrećinske većine za prodaju zemljišta.”

Javna garaža, izgrađena kreditom koji danas vraćamo, posluje mnogo bolje nego ranije, a brojevi govore



sami za sebe:

Promet garaže:

- 2025: 1.792.465 KM
- 2024: 1.167.524 KM
- 2023: 666.144 KM
- 2022: 764.636 KM
- 2021: 417.169 KM
- 2020: 158.971 KM

Za 2 godine mog mandata prihod garaže iznosio je 2.959.989 KM, što je više nego u 4 godine prije toga, kada je ostvaren prihod od 2.006.617 KM. Posebna razlika vidi se i na uličnim parkinzima:

- 2025: 2.425.958 KM
- 2022: 405.762 KM

“Izračunajte sami gdje je taj novac ranije završavao i koliko miliona razloga postoji za svakodnevne napade. Pred nama je još mnogo posla kako bismo ovu oblast u potpunosti uredili, ali smo na dobrom i poštenom putu. Ovaj rast jasno pokazuje koliko se prihoda ranije gubilo zbog nepostojanja



sistema i odgovornog upravljanja. Danas se prihodi od parkinga, koji više ne završavaju u privatnim džepovima, ulažu u škole, igrališta, ceste i druge projekte”, naglasio je načelnik.

Općina Stari Grad Sarajevo nastavit će unapređivati sistem upravljanja parkingom s ciljem dodatnog povećanja prihoda i ulaganja u projekte od javnog interesa.



OSVJETLJENJE TUNELA VRATNIK JE VAŽAN PROJEKAT OPĆINE I CESTA FBIH

U prostorijama JP Ceste Federacije BiH održan je radni sastanak o realizaciji zajedničkih projekata planiranih za 2026. godinu.

Poseban fokus bio je na projektu rasvjete u tunelu Vratnik na magistralnoj cesti M5 (Šeherćehajin most – Korija), za koji je sporazum o implementaciji potpisan još 2021. godine. Načelnik Irfan Čengić istakao je da su sada stvoreni uslovi za realizaciju ovog važnog projekta, kao i potrebu uklanjanja nelegalnih parkinga na Bentbaši zbog sigurnosnih rizika.

Zahvalio se i na asfaltiranju tranzita, podsjetivši da je zajedničkim djelovanjem više nivoa vlasti saniran put prema Trebeviću kroz Stari Grad, vrijedan oko 2 miliona KM.

Razmatrani su i projekti uspostave "drop off" zone kod Vijećnice, s ciljem rješavanja nelegalnog parkiranja autobusa, te uređenje pješačke zone od Vijećnice do tunela Vratnik, čime će se unaprijediti komunalni red i sigurnost saobraćaja.



KONKRETNE MJERE ZA POBOLJŠANJE USLOVA ŽIVOTA ROMSKE POPULACIJE

U saradnji sa Ministarstvom za ljudska prava i izbjeglice Bosne u Hercegovine, u okviru projekta „Poboljšanje uslova života Roma na teritoriji Općine Stari Grad Sarajevo“, Općina je provela postupak javne nabavke za sanaciju jedne stambene jedinice, a koja je dodijeljena romskoj porodici u skladu sa uslovima Javnog poziva za stambeno zbrinjavanje Roma u Općini Stari Grad Sarajevo. Projekat je realizovan s ciljem unapređenja stambenih uslova romske populacije kroz renoviranje i sanaciju postojećih stambenih jedinica.

Sanacijom objekta u ulici Mačkareva obuhvaćena je jedna stambena jedinica, čime je ova aktivnost postala druga realizovana stambena jedinica stambenog zbrinjavanja romske populacije koja se provodi na ovaj način na području Općine Stari Grad Sarajevo.



Zajednička saradnja



POTPISAN UGOVOR ZA ZAKUP KASARNE „FALETIĆI“: STARI GRAD DOBIJA PRVI SPORTSKO-REKREATIVNI CENTAR

U sarajevskoj Vijećnici 10. marta je potpisan ugovor o dodjeli u zakup lokaliteta kasarne „Faletići“ firmi MIH INVEST d.o.o. Sarajevo, čime su stvoreni uslovi za aktiviranje ovog značajnog prostora i njegovu transformaciju u prvi sportsko-rekreativni centar na području Općine Stari Grad.

Općinsko vijeće prethodno je dalo saglasnost Općinskom načelniku za donošenje rješenja o dodjeli ovog lokaliteta u zakup na period od pet godina. Nakon potpisivanja ugovora upriličen je i obilazak lokaliteta kasarne „Faletići“, kojem su prisustvovali načelnik Općine Stari Grad Irfan Čengić, vijećnici Općinskog vijeća, predstavnici zakupca MIH INVEST d.o.o. Sarajevo, te humanitarac i privrednik Hajriz Brčvak.





“Nakon 30 godina propadanja ovog prostora i stvaranja divlje deponije, Općina je zajedno sa Vladom FBiH i Gradom Sarajevo uložila oko 400.000 KM u sanaciju putne infrastrukture na ovoj lokaciji. Nakon transparentne procedure i javnog poziva, što je rijetkost kada govorimo o vojnoj neperspektivnoj imovini, sklapanjem današnjeg ugovora stvaraju se uslovi za milionsku investiciju u Faletićima”, naglasio je načelnik Čengić. Također, apelovao je na Federalno pravobranilaštvo da postupi u skladu sa zakonom, odlukom Vlade i vlastitom praksom iz sličnih slučajeva, kako bi se omogućila hitna obnova jednog od najvažnijih nacionalnih spomenika u Bosni i Hercegovini Kasarne “Jajce”. Također, naglasio je da je i ovaj projekat najbolji pokazatelj zašto je važno da se konačno riješi pitanje državne imovine, jer milioni kvadratnih metara širom BiH su neiskorišteni i gubi se prilika za investicijama koje se mjere u stotinama miliona KM. Firma MIH INVEST dostavila je idejno rješenje koje predviđa niz sadržaja u okviru budućeg sportsko-rekreativnog centra, čime bi ovaj prostor u narednom periodu trebao postati novo mjesto za sport, rekreaciju i boravak građana. Potpisan je i sporazum sa Gradom Sarajevo o sufinansiranju unapređenja putne infrastrukture i uspostave biciklističke staze u kasarni Faletići, kao podrška projektu koji je Općina započela u saradnji s Federalnim ministarstvom kulture i sporta.



Zajednička saradnja

OPĆINA STARI GRAD FINANSIRALA RADOVE U HAREMU LUBINE DŽAMIJE

Općina Stari Grad Sarajevo finansirala je sanaciju krovnog limenog pokrivača na mektebu u haremu Lubine džamije, odnosno zamjenu dotrajalog lima tradicionalnim krovnim pokrivačem od ćeremita. U sklopu projekta je i ugradnja nove šadrvan česme.

U posjeti bili su načelnik Općine Stari Grad Sarajevo Irfan Čengić i predsjedavajući Općinskog vijeća Stari Grad Sarajevo Seid Škaljić. Tokom obilaska istaknuto je da Općina kontinuirano ulaže u očuvanje vjerskih i kulturno-historijskih objekata, prepoznajući njihov značaj za lokalnu zajednicu i očuvanje tradicije.

Realizacijom ovih radova stvoreni su bolji uslovi za odvijanje vjerskih i edukativnih aktivnosti, a harem Lubine džamije dobio je uredniji i funkcionalniji prostor.



INTERVENCIJE NA ČIŠĆENJU SNIJEGA

Od početka snježnih padavina, JKP Općine Stari Grad kontinuirano je bilo angažovano na terenu, provodeći aktivnosti čišćenja u skladu s raspoloživim kapacitetima i utvrđenim planovima zimskog održavanja. Sve saobraćajnice I i II prioriteta pravovremeno su očišćene, čime je osigurana njihova prohodnost i sigurnost za učesnike u saobraćaju. Pored redovnih aktivnosti, ekipe su bile angažovane i na uklanjanju oboreni stabala na lokalitetu Trebevića. Očišćen Baščaršijski trg povodom Bajrama JKP Općine Stari Grad izvršilo je temeljno čišćenje Trga povodom Ramazanskog bajrama, s ciljem uređenja i pripreme javnog prostora za obilježavanje ovog značajnog praznika. Aktivnosti su obuhvatile detaljno čišćenje pješačkih površina, uklanjanje otpada, kao i dodatno uređenje prostora kako bi građani Bajram dočekali u čistom i ugodnom ambijentu.





OBILAZAK RADOVA NA MUZEJU MERSAD BERBER

S članovima porodice Berber upriličen je obilazak radova na budućem Muzej "Mersad Berber", posvećenom djelu jednog od najznačajnijih bh. umjetnika.



POČELA SANACIJA DJEČIJIH IGRALIŠTA U STAROM GRADU

Na području Općine Stari Grad Sarajevo započeli su radovi na sanaciji dječijih igrališta u saradnji sa KJKP Park, u čijoj je nadležnosti njihovo održavanje. Općina je za ove radove izdvojila značajna sredstva, cijeneći sigurnost djece, iako je riječ o kantonalnoj nadležnosti.

Sanacija dječijeg igrališta vrtića "Pčelica"

Općina Stari Grad Sarajevo započela je i radove na sanaciji dječijeg igrališta vrtića „Pčelica“, kao nastavak ulaganja u unapređenje uslova boravka i rada u odgojno-obrazovnim ustanovama na području Starog Grada.






PLATE U STAROM GRADU IZNAD PROSJEKA: RAST KOJI NADMAŠUJE INFLACIJU

Prosječna plata stanovnika Općine Stari Grad Sarajevo u 2025. godini iznosila je 1.930 KM, čime je među najvišima u Bosni i Hercegovini – čak 21% iznad federalnog prosjeka. Projekcije za ovu godinu pokazuju da će prosječna plata premašiti 2.000 KM, što dodatno potvrđuje pozitivan trend rasta životnog standarda.

U protekle tri godine, prosječna plata u Starom Gradu porasla je za oko 30%, dok je zbirna inflacija u istom periodu iznosila približno 13%. Ovaj odnos jasno pokazuje realan rast primanja građana, odnosno povećanje njihove kupovne moći.

Rast plata rezultat je kombinacije faktora – prije svega vrijednog rada zaposlenih i uspješnog poslovanja lokalnih privrednika, ali i šireg ekonomskog okvira koji uključuje smanjenje poreza i doprinosa na plate te povećanje minimalne plate.

Uprkos ovim pozitivnim pokazateljima, ostaje izazov pravednije raspodjele javnih prihoda, kako bi lokalne zajednice poput Starog Grada imale još veće koristi od ekonomskog doprinosa svojih građana i privrede.



NOVA ULAGANJA U PRVU BOŠNJAČKU GIMNAZIJU

Načelnik Općine Stari Grad Sarajevo Irfan Čengić i direktorica Prve bošnjačke gimnazije Emela Mehmedspahić potpisali su Sporazum o saradnji kojim je definisana realizacija projekta zamjene parketa u fiskulturnoj sali, čime će učenicima biti omogućeni kvalitetniji i sigurniji uslovi za izvođenje nastave tjelesnog i zdravstvenog odgoja, kao i sportskih aktivnosti.

Ovaj projekat predstavlja nastavak kontinuiranih milionskih ulaganja Općine u unapređenje obrazovne infrastrukture i uslova rada. U prethodnom periodu Općina Stari Grad sufinansirala je i sanaciju krova škole Prve bošnjačke gimnazije, čime su riješeni dugogodišnji problemi i dodatno poboljšani uslovi boravka i rada u ovoj ustanovi. Direktorica Mehmedspahić zahvalila je Općini na kontinuiranoj podršci, ističući da ovakvi projekti imaju višestruki značaj za učenike i nastavno osoblje.

Na ovom projektu zajednički sarađuju Općina Stari Grad i Grad Sarajevo koji sufinansiraju radove na sportskoj sali. Ove aktivnosti su nastavak programa ulaganja milionskih iznosa u obrazovne objekte koji se realizuju za vrijeme načelnika Čengića.

Potpisu sporazuma su prisustvovali i Adela Plakalo, sekretar Općinskog organa uprave, dopredsjedavajući vijeća Vedad Deljković i vijećnik Muamer Mekić.



Podrška obrazovnim ustanovama



NASTAVAK MILIONIŠKIH ULAGANJA U ŠKOLSKE OBJEKTE

Načelnik Irfan Čengić posjetio je Osnovnu školu "Mula Mustafa Bašeskija" na Logavinoj, gdje je upriličeno potpisivanje Sporazuma o saradnji za realizaciju projekata planiranih u 2026. godini. Predviđena je sanacija krova na područnoj školi na Sedreniku, kao i obnova fasade centralnog školskog objekta u ulici Logavina. Nedavno su u ovoj školi okončani radovi na školskim toaletima, a na krov područne škole na Sedreniku ranije je postavljena i fotonaponska elektrana čime je nastavljen kontinuitet ulaganja u unapređenje školskih uslova.

Sporazum su potpisali načelnik Irfan Čengić i direktorica škole Emina Mujan.

Riječ je o nastavku sistemskog pristupa ulaganju u obrazovanje, s ciljem poboljšanja boravka učenika i rada nastavnog osoblja.





POTPISAN UGOVOR ZA UREĐENJE SPORTSKOG TERENA U OŠ „VRHBOSNA“

Načelnik Čengiđ, potpisao je sa gradonačelnikom Samirom Avdićem, ugovor o realizaciji projekta „Uređenje sportskog terena ispred JU OŠ Vrhbosna“.

Riječ je o značajnom projektu čija vrijednost prelazi pola miliona KM. Radovi na igralištu privremeno su bili obustavljeni zbog kašnjenja u uplati sredstava s nivoa Federacije BiH, usljed administrativnih procedura. Očekuje se da će u narednom periodu doći do nastavka radova, čim se završe sve potrebne procedure i osiguraju sredstva.

Načelnik Čengiđ naglasio je zahvalnost gradonačelniku Avdiću, ali i ranijoj podršci Vladi FBiH. U Osnovnoj školi „Vrhbosna“ realizovani su i započeti brojni značajni projekti. U toj školi u potpunosti je završen projekt zamjene vanjske stolarije na dijelu objekta, čime je riješen dugogodišnji problem dotrajalih prozora koji su otežavali zagrijavanje učionica. Ranije je također postavljena fotonaponska elektrana na krovu škole. Također, u ovoj školi potpisan je sporazum o realizaciji novih projekata za 2026. godinu, uključujući zamjenu pokrova na fiskulturnoj sali te opremanje kabineta biologije, fizike i hemije.



Općinsko vijeće



KONTINUITET RADA I VAŽNE ODLUKE: ODRŽANE 14., 15. I 16. SJEDNICA OPĆINSKOG VIJEĆA STARI GRAD SARAJEVO

14. sjednica Općinskog vijeća Stari Grad Sarajevo

Održana je 14. redovna sjednica Općinskog vijeća Stari Grad Sarajevo. Sjednici su prethodili Kolegij Općinskog vijeća sa šefovima klubova političkih stranaka i samostalnih vijećnika.

Predsjedavajući Općinskog vijeća Stari Grad Sarajevo Seid Škaljić naglasio je da je još jedna produktivna sjednica Općinskog vijeća Stari Grad Sarajevo iza nas. "Na ovoj sjednici vijećnici su dali konačnu suglasnost za prodaju devastiranog objekta u na čijem mjestu uskoro počinje gradnja stanova za mlade. Obećali smo da će to biti jedan od fokusa našeg rada i drago mi je da smo uspjeli u tome", istakao je predsjedavajući Škaljić.

U okviru tačaka iz nadležnosti Stručne službe kabineta Općinskog načelnika, Općinsko vijeće usvojilo je Odluku o Godišnjem planu rada Općine Stari Grad Sarajevo za 2026. godinu, kao i Zaključak kojim se daje saglasnost na Sporazum o čišćenju i održavanju putnih pravaca Crepoljsko, Biosko i Trebević između Općine Stari Grad Sarajevo i Opštine Istočni Stari Grad za 2026. godinu. Vijećnici su također primili k znanju Informaciju o inspeksijskom nadzoru Porezne uprave Federacije Bosne i Hercegovine. Razmatran je i usvojen Prijedlog odluke iz nadležnosti Službe za imovinsko-pravne, geodetske poslove, katastar i stambene poslove, kojim se odobrava prodaja stambenog objekta koji se ruši i neizgrađenog građevinskog zemljišta u ulici Brusulje broj 3 Fondu Kantona Sarajevo za izgradnju stanova za članove porodica šehida i poginulih boraca, ratne vojne invalide, demobilizirane borce i prognane osobe. Na sjednici je razmatran i usvojen Izvještaj o realizaciji Programa rada Općinskog vijeća Stari Grad Sarajevo za 2025. godinu, te razmotren Nacrt Programa rada Općinskog vijeća za 2026. godinu.



15. sjednica Općinskog vijeća Stari Grad Sarajevo

Općinsko vijeće Stari Grad Sarajevo održalo je 26. februara 15. redovnu sjednicu na kojoj su vijećnici razmatrali i usvojili sve tačke dnevnog reda. Donesene su odluke iz nadležnosti Stručne službe kabineta Općinskog načelnika, kao i saglasnosti na sporazume o dodjeli finansijskih sredstava javnim komunalnim preduzećima za 2026. godinu, s ciljem unapređenja komunalnih usluga, sigurnosti i održavanja javnih površina, uključujući nabavku specijalizovanog vozila i poboljšanje uslova na dječijim igralištima. Usvojene su i izmjene i dopune odluke o zakupu poslovnih prostora, kojima se omogućava smanjenje kirija za udruženja, fondacije i javne ustanove, uz odlučivanje u svakom pojedinačnom slučaju. U oblasti imovinsko-pravnih odnosa data je saglasnost za dodjelu u zakup Kasarne „Faletići“ kompaniji MIH INVEST d.o.o. Sarajevo na period od pet godina, čime se stvara osnov za aktiviranje ovog lokaliteta.

Predsjedavajući Seid Škaljić istakao je da usvajanje svih 37 tačaka pokazuje odgovoran i konstruktivan rad Vijeća, posebno naglašavajući unapređenje sigurnosti na dječijim igralištima i pokretanje projekta Kasarne u Faletićima.

16. sjednica Općinskog vijeća Stari Grad Sarajevo

Data je saglasnost na sporazume o saradnji sa općinama Bağcılar (Turska) i Al-Ram (Jerusalem), čime se jača međunarodna saradnja i razmjena iskustava. Usvojene su odluke o visini naknada za građevinsko i poljoprivredno zemljište te renta za 2026. godinu. U oblasti privrede razmatrane su odluke vezane za poslovne prostore, uključujući izmjene ranijih odluka o zakupu, privremeno umanjeње zakupnina na Gajevom trgu, te izmjene ugovora i utvrđivanje djelatnosti u pojedinim objektima.

Iz oblasti investicija i komunalnih poslova usvojene su dopune saobraćajnog elaborata parkiranja, odluke o cijenama parkinga i dodjeli parking prostora javnom preduzeću, kao i izmjene pravilnika o sanaciji stambenih jedinica socijalno ugroženih kategorija. Razmatrani su i finansijski izvještaji, uključujući realizaciju budžeta za 2025. godinu i završni obračun, čime je predstavljen finansijski presjek poslovanja Općine.



Zajednička saradnja



ODRŽANI ZBOROVI GRAĐANA U SVIH 16 MJESNIH ZAJEDNICA

Početkom aprila u Općini Stari Grad Sarajevo uspješno su okončani zborovi građana u svih 16 mjesnih zajednica, a posljednji su održani u mjesnim zajednicama Baščaršija, Ferhadija i Mjedenica, uz prisustvo načelnika Irfana Čengića, predstavnika Općine i Općinskog vijeća.

Poseban fokus tokom zborova bio je na Nacrtu zakona o legalizaciji objekata. Predstavljene su ključne odredbe, a građani su imali priliku postaviti pitanja i dobiti konkretne odgovore vezane za svoje predmete. Posebno je naglašeno da se radi o mjesnim zajednicama koje su većim dijelom, a u slučaju Baščaršije i Ferhadije u cjelosti, u obuhvatu urbanog historijskog krajolika koji je proglašen nacionalnim spomenikom. Istaknuto je da će se nastojati pronaći adekvatan modus te predložiti nadležnim organima način rješavanja pitanja legalizacije u ovim područjima, uz uvažavanje činjenice da je za postupanje nadležno Federalno ministarstvo prostornog uređenja. Nacrt zakona dostupan je putem zvanične stranice Skupštine Kantona Sarajevo.

U svim mjesnim zajednicama otvorene su i teme od značaja za svakodnevni život građana, uključujući komunalne probleme poput čistoće, parkinga i infrastrukture.

Završetkom zborova u svim mjesnim zajednicama, Općina Stari Grad Sarajevo još jednom je potvrdila opredijeljenost za direktnu komunikaciju s građanima i uključivanje lokalne zajednice u procese donošenja odluka.





IZBORI ZA SAVJETE MJESNIH ZAJEDNICA

Izbori za članove savjeta mjesnih zajednica na području Općine Stari Grad Sarajevo održani su 19.04.2026. godine. Građani su u 16 mjesnih zajednica birali ukupno 98 predstavnika koji će u narednom periodu učestvovati u donošenju odluka od značaja za lokalne zajednice.

Prema izvodu iz Centralnog biračkog spiska, pravo glasa imalo je 35.914 građana. U zavisnosti od mjesne zajednice, birano je između 5 i 7 članova savjeta, čime je osigurana adekvatna zastupljenost građana u radu lokalnih organa.

Izborni proces protekao je bez problema, a odziv građana bio je u skladu s očekivanjima. Proces glasanja odvijao se na unaprijed određenim lokacijama, a rezultati glasanja biće objavljeni u narednim danima.



Podrška



POMOĆ ZA SANACIJU OBJEKATA SOCIJALNO UGROŽENIH U STAROM GRADU

Potpisani su ugovori o dodjeli pomoći za sanaciju stambenih jedinica socijalno ugroženim kategorijama sa područja općine.

Ovom prilikom potpisani su ugovori sa 40 korisnika koji su ispunili propisane uslove javnog poziva, a kojima su obezbijedena sredstva za poboljšanje uslova stanovanja. Ugovore je sa korisnicima potpisao općinski načelnik Irfan Čengić.

“Napravili smo sistem, a ne kao prije da morate moliti načelnika za pomoć i da ste dužni. Nikome ništa niste dužni, ovo je program Općine kojim brine o svojim građanima”, naglasio je načelnik Čengić.

Potpisivanju su prisustvovali i predsjedavajući Općinskog vijeća Stari Grad Seid Škaljić, te predstavnici nadležnih službi Općine.

Ova aktivnost predstavlja nastavak kontinuirane podrške Općine Stari Grad građanima u stanju socijalne potrebe, s ciljem unapređenja uslova života i osiguranja sigurnijeg stanovanja. S obzirom na ograničena sredstva u prethodnoj budžetskoj godini, dio aplikanata koji su ispunili kriterije nije mogao biti obuhvaćen ranijom raspodjelom, zbog čega je nastavak realizacije osiguran kroz Budžet za 2026. godinu.





POTPISANI UGOVORI ZA DODJELU 49 PLASTENIKA: OPĆINA NASTAVLJA SNAŽNU PODRŠKU POLJOPRIVREDI

Upriličeno potpisivanje ugovora sa 49 korisnika koji su ostvarili pravo na dodjelu plastenika po javnom pozivu objavljenom na zvaničnoj stranici Općine.

Korisnicima je dodijeljeno ukupno 49 plastenika, od čega 29 plastenika površine 50 m² i 20 plastenika površine do 30 m². Ova mjera dio je kontinuirane podrške Općine razvoju poljoprivredne proizvodnje.

Načelnik Općine Stari Grad Sarajevo, Irfan Čengić, istakao je značaj ovakvih projekata.

„Većina ljudi zapravo ne shvata da Stari Grad nije samo uža jezgra, već da čak 80% naše općine čine zelene površine i prostori s velikim potencijalom za poljoprivredu. Zato ovi projekti imaju izuzetan značaj za našu zajednicu. Kroz ovu aktivnost pružamo konkretnu podršku lokalnim poljoprivrednicima i građanima koji se bave uzgojem vlastite hrane, što u današnje vrijeme predstavlja ne samo ekonomsku prednost, već i veliku životnu vrijednost. Korisnici su sredstva dobili na javnom pozivu jer su ispunili uvjete, a ne zbog poznanstva s načelnikom“, istakao je načelnik Čengić.

Simboličnom podjelom ugovora odabranim korisnicima ozvaničen je nastavak saradnje, a Općina Stari Grad Sarajevo zahvaljuje svim učesnicima javnog poziva i želi uspješnu realizaciju planiranih aktivnosti.

Podsjećamo, Općina Stari Grad kroz različite programe podsticaja pruža podršku plasteničkoj, povrtlarskoj, voćarskoj, ratarskoj, pčelarskoj i stočarskoj proizvodnji, kao i nabavci poljoprivredne mehanizacije i sufinansiranju plastenika.

U periodu od 2023. do 2026. godine, Općina je dodijelila ukupno 240 plastenika, čime potvrđuje opredijeljenost za kontinuiran razvoj poljoprivrede i podršku građanima koji žele unaprijediti vlastitu proizvodnju.



Podrška mladima



REKORDAN IZNOS STIPENDIJA

Potpisani su ugovori sa stipendistima Općine Stari Grad Sarajevo za školsku/akademsku 2025/2026. godinu, čime je započela realizacija rekordnog programa stipendiranja učenika i studenata na području ove općine.

„U odnosu na prethodni period odnosno 2022. godinu, više nego smo udvostručili sredstva za stipendije. Sa oko 330.000 KM na više od 700.000 KM godišnje, kroz povećanje i broja korisnika i pojedinačnih iznosa stipendija. Istovremeno, zajedno s Gradom Sarajevom, Kantonom Sarajevo i Vladom Federacije BiH, ulažemo više od 8 miliona KM u obrazovne objekte i obrazovnu infrastrukturu.“ naglasio je načelnik Čengić.

U okviru Službe za obrazovanje, kulturu, sport i mlade, u školskoj/akademske 2025/2026. godini stipendije se dodjeljuju sljedećim kategorijama: nadarenim učenicima srednjih škola i studentima s područja Općine Stari Grad Sarajevo, učenicima i studentima bez oba roditelja, odnosno bez roditeljskog staranja i učenicima iz oblasti deficitarnih zanata – obrta i zanimanja. Istovremeno, putem Službe za boračko-invalidsku i socijalnu zaštitu, dodjeljuju se stipendije učenicima i studentima – djeci boračke populacije. U mandatu načelnika Općine Stari Grad Sarajevo Irfana Čengića, Općina je napravila snažan i vidljiv iskorak u oblasti podrške mladima i obrazovanju. U poređenju s ranijim godinama, posebno periodom od 2020. do 2022. godine, kada je Općina Stari Grad Sarajevo godišnje u prosjeku izdvajala oko 312.600 KM za stipendije, današnji pokazatelji jasno govore o snažnom iskoraku. U školskoj/akademske 2025/2026. godini dodijeljeno je ukupno 466 stipendija učenicima i studentima, uz ukupna izdvojena sredstva od 715.500 KM, što predstavlja najveći broj stipendija i najveće ulaganje u obrazovanje do sada.



ISABELLA KOMAR – PERSPEKTIVNA STUDENTICA IZ STAROG GRADA

Isabella Komar, dvadesetogodišnja Sarajevo, ističe se kao predana posvećena akademskom raz-političkih nauka, na odsjeku gdje kontinuirano radi na tata i unapređenju svog „Stipendiju doživljam kao trud, ali i dodatnu motivac-mi značajno olakšava stu-kada je riječ o nabavci litera-Istovremeno, omogućava mi poput kurseva šminkanja, da razvijam kreativnost, ali potrebe. Ono što me posebno varim vlastiti potencijal i postig-zbog stipendije, već prije svega rezultat discipline, rada i vjere u vlas-



studentica iz Općine Stari Grad i ambiciozna mlada osoba voju. Studentica je Fakulteta Sigurnosne i mirovne studije, postizanju što boljih rezul-znanja. priznanje za dosadašnji iju za dalje uspjehe. Ona dentski život, posebno ture i dodatnoj edukaciji. da ulažem u lične interese, koji su moj hobi i način i pokrijem svakodnevne motiviše jeste želja da ost-nem što bolji prosjek, ne samo zbog sebe. Smatram da je uspjeh tite mogućnosti.“



POSVEĆENOST, AMBICIJA I LIČNI RAZVOJ

Kroz svoje obrazovanje i svakodnevni angažman, Isabella pokazuje visok nivo odgovornosti i jasnu viziju budućnosti. Stipendija za nju predstavlja više od finansijske podrške – ona je potvrda uloženog truda i dodatni podstrek da nastavi graditi svoj akademski i lični put.

Njena posvećenost učenju, uz istovremeno razvijanje kreativnih interesa, svjedoči o svestranosti i spremnosti da se suoči sa izazovima modernog društva. Isabella planira nastaviti ulagati u svoje znanje i vještine, s ciljem da ostvari značajan doprinos u oblasti sigurnosnih i mirovnih studija, ali i da kroz lični razvoj izgradi stabilnu i uspješnu karijeru.



Zajednička saradnja



OPĆINI DODIJELJEN CERTIFIKAT „LOKALNA ZAJEDNICA NAKLONJENA MLADIMA“

Općina Stari Grad Sarajevo uspješno je ispunila sve kriterije Javnog poziva Instituta za razvoj mladih „Kult“ i danas joj je zvanično dodijeljen certifikat „Lokalna zajednica naklonjena mladima“, kao potvrda sistemskog i odgovornog pristupa razvoju politika prema mladima.

„Ovaj certifikat doživljavamo kao potvrdu da politike prema mladima u Starom Gradu nisu rezultat improvizacije, već sistemskog rada, jasnih kriterija i dugoročne vizije. Mladi nisu samo korisnici naših programa, oni su aktivni partneri u odlučivanju i ključni nosioci budućeg razvoja naše zajednice. Nastavljamo raditi na realizaciji naše Strategije razvoja Općine do 2027. godine“, naglasio je načelnik Čengić. Nakon provedenog komisijskog ocjenjivanja i detaljne analize uspješnosti provođenja politika, zakona, mjera, programa i aktivnosti usmjerenih ka mladima, Općina Stari Grad Sarajevo ostvarila je visok stepen usklađenosti sa propisanim standardima. Certifikat je, u ime Instituta „Kult“, načelniku Općine uručila predstavnica Instituta Jasmina Banjalukčić.



RAZMJENA UČENIKA: BEOGRADSKA GIMNAZIJA U POSJETI OPĆINI

Prva gimnazija Sarajevo je po peti put dobitnik #RYCO projekta, a po treći put odabrana za projekat razmjene „Superschools“. Partner Prve gimnazije Sarajevo u ovom projektu je XIII beogradska gimnazija, a u okviru saradnje organizovana je razmjena učenika koja obuhvata niz radionica usmjerenih na izgradnju pomirenja, međusobnog razumijevanja i prijateljstva na Zapadnom Balkanu.

Razmjena u Sarajevu realizovana je u periodu od 1. do 6. februara, uz učešće po 15 učenika iz svake škole, koji su tokom boravka boravili u domovima svojih vršnjaka. U okviru programa, učenici su posjetili Općinu Stari Grad Sarajevo, gdje su imali priliku da se upoznaju s radom lokalne zajednice, nadležnostima općinskih institucija i njihovom ulogom u procesu razvoja i međuinstitucionalne saradnje.



Zajednička saradnja



UGOVOR ZA JAČANJE KAPACITETA SIGURNE KUĆE I ZAŠTITE ŽENA

Povodom 8. marta – Međunarodnog dana žena, Općina Stari Grad Sarajevo i Općina Novo Sarajevo potpisale su sporazum o zajedničkoj saradnji na realizaciji i sufinansiranju projekta iz oblasti socijalne zaštite, čiji je cilj jačanje podrške ženama i djevojkama žrtvama nasilja.

Sporazum su potpisali načelnik Općine Stari Grad Sarajevo Irfan Čengić i načelnica Općine Novo Sarajevo Benjamina Karić, potvrđujući opredijeljenost lokalnih zajednica da zajednički djeluju na unapređenju sistema zaštite najranjivijih kategorija društva.

“Realizujemo inicijativu koju je predložila vijećnica Selvira Vilić da budemo podrška ženama žrtvama nasilja. Ovim programom će dvije porodice imati privremeni smještaj i nakon izlaska iz sigurne kuće. Zahvaljujem kolegici načelnici Benjmini Karić koja je prepoznala važnost ovakvih politika i koja će podržati ove aktivnosti”, naglasio je načelnik Čengić.

Predstavnice Fondacije lokalne demokratije BiH zahvalile su se načelniku Čengiću u načelnici Karić, te naglasili da su od njih uvijek imali podršku i dok su obavljali ranije dužnosti.





JAČANJE SARADNJE IZMEĐU OPĆINA STARI GRAD I OSMANGAZI

Delegacija Općine Stari Grad Sarajevo boravila je u službenoj posjeti pobratimskoj općini Osmangazi u Bursa, s ciljem jačanja međusobne saradnje i učešća u obilježavanju 700. godišnjice osvajanja Burse, kao i festivala posvećenog Osman Gaziji. Delegaciju su činili načelnik Irfan Čengić, predsjedavajući Općinskog vijeća Seid Škaljić te vijećnici Emir Bićo i Alem Bakija. Posjeta je realizovana u okviru dugogodišnjih prijateljskih odnosa između dvije općine, koje su pobratimljene još 2007. godine. Tokom boravka upriličen je niz sastanaka na kojima je razgovarano o unapređenju saradnje u oblastima privrede, kulture, turizma i povezivanja mladih. Poseban fokus stavljen je na razvoj zajedničkih projekata i jačanje ekonomskih veza, kao i promociju turističkih potencijala Starog Grada. Delegacija je prisustvovala i sportskim i kulturnim događajima, uključujući fudbalsku utakmicu lokalnih klubova, gdje je upriličena simbolična razmjena dresova, dodatno naglašavajući prijateljske odnose između Bosne i Hercegovine i Turske. Načelnik Čengić istakao je značaj kontinuirane međunarodne saradnje, naglasivši da su projekti poput razmjene učenika jedan od najvažnijih segmenata povezivanja mladih i jačanja dugoročnih veza između dvije općine. U narednom periodu planirano je dodatno unapređenje saradnje, s posebnim akcentom na razmjenu učenika, ali i otvaranje novih prilika u oblasti privrede, kulture i turizma.



NAČELNIK ČENGIĆ PRISUSTVOVAO NACIONALNOM MOLITVENOM DORUČKU U WASHINGTONU

Načelnik Općine Stari Grad Sarajevo Irfan Čengić, na poziv kongresmena Jonathana Jacksona i Bena Clinea, prisustvovao je Nacionalnom molitvenom doručku u Washingtonu, na kojem se obratio predsjednik Sjedinjenih Američkih Država Donald Trump.

Iako nije riječ o događaju u organizaciji američke vlade, Nacionalni molitveni doručak tradicionalno predstavlja jednu od najvažnijih platformi za susrete i umrežavanje, s obzirom na to da mu svake godine prisustvuju izuzetno značajne ličnosti sa svjetske političke scene, veliki broj senatora, kongresmena i visokih zvaničnika administracije Sjedinjenih Američkih Država.

Tom prilikom načelnik Čengić susreo se i sa kongresmenom Robert Aderholt, dugogodišnjim dobrim poznavaoцем prilika u Bosni i Hercegovini.

„Nakon što smo bili jedna od rijetkih lokalnih zajednica koja je podržala aktivnosti postavljanja spomenika Cvijet Srebrenice u sjedištu Ujedinjenih nacija, nastavili smo s jačanjem saradnje sa institucijama u Sjedinjenim Američkim Državama i održavanjem čvrstih veza s našom dijasporom. Prisustvo Nacionalnom molitvenom doručku bila je dobra prilika da kroz razgovore i umrežavanje stvaramo nove kontakte s administracijom našeg najvažnijeg strateškog partnera, u vremenu punom globalnih izazova. Također, potpisivanje sporazuma o bratimljenju sa Wethersfieldom predstavlja institucionalnu saradnju i trajno povezivanje naših zajednica“, istakao je načelnik Čengić.



Protokol i saradnja

POTPISAN SPORAZUM SA GRADOM WETHERSFIELD-om I POSJETA DIJASPORI

Tokom posjete Sjedinjenim Američkim Državama, načelnik Irfan Čengić potpisao je sporazum o bratimljenju između Općine Stari Grad Sarajevo i grada Wethersfield u saveznoj državi Connecticut. Sporazum je prethodno odobrilo Općinsko vijeće, nakon što je načelnik uspostavio kontakte s jednim od najstarijih gradova u Sjedinjenim Američkim Državama, u kojem živi značajan broj stanovnika porijeklom iz Bosne i Hercegovine. Svečanom potpisivanju sporazuma prisustvovao je i ambasador Bosne i Hercegovine pri Ujedinjenim nacijama, Nj. E. Zlatko Lagumdžija, kao i predsjedavajući Općinskog vijeća Stari Grad Sarajevo Seid Škaljić. Tokom boravka u saveznoj državi Connecticut održani su i sastanci sa kongresmenima i senatorima iz ove savezne države.

Ovaj sporazum predstavlja važan korak u unapređenju saradnje između dvije zajednice kroz program Sister Cities. Općina Stari Grad Sarajevo i do sada je imala jednu od najkvalitetnijih međunarodnih saradnji među lokalnim zajednicama u Bosni i Hercegovini, koja je ovim sporazumom dodatno osnažena. Kroz međunarodne aktivnosti do sada su osigurani milionski iznosi za projekte u Starom Gradu, a takva praksa bit će nastavljena i u budućnosti.






NAČELNIK ČENGIĆ ODRŽAO SASTANKE S KONGRESMENIMA ADERHOLTOM I TURNEROM

Načelnik Općine Stari Grad Sarajevo Irfan Čengić je tokom borakja u službenoj posjeti Washingtonu, održao sastanke s kongresmenima Robertom Aderholtom i Mikeom Turnerom, članovima Predstavničkog doma Kongresa Sjedinjenih Američkih Država.

Tokom sastanaka razgovarano je o jačanju saradnje između lokalnih zajednica, ulozi bosanskohercegovačke dijaspore u Sjedinjenim Američkim Državama, te mogućnostima unapređenja bilateralnih odnosa kroz konkretne projekte na lokalnom nivou.



Protokol i saradnja



SUSRETI NAČELNIKA ČENGIĆA SA GRADONAČELNICIMA ANKARE I KOTORA

Načelnik Općine Stari Grad Sarajevo Irfan Čengić ostvario je odvojene susrete sa gradonačelnikom Ankare Mansurom Yavaşom i gradonačelnikom Kotora Vladimirom Jokićem. Sa gradonačelnikom Ankare održan je radni doručak na kojem je razgovarano o uspostavljanju saradnje sa jednom od historijskih i centralnih općina glavnog grada Turske, s ciljem jačanja institucionalnih veza i pokretanja zajedničkih projekata. U susretu sa gradonačelnikom Kotora Vladimirom Jokićem fokus razgovora bio je na turizmu i zaštiti kulturno-historijskog naslijeđa, uz razmjenu iskustava i definisanje mogućnosti za buduću saradnju. „Općina Stari Grad Sarajevo ima snažnu međunarodnu saradnju iz koje dobijamo nova iskustva, ali i konkretne rezultate kroz milionske projekte koje realizujemo sa našim partnerima“, istakao je načelnik Čengić.

SASTANAK SA YASINOM YILDIZOM, NAČELNIKOM OPĆINE BAĞCILAR

Načelnik Općine Stari Grad Sarajevo Irfan Čengić tokom proteklog perioda realizovao je niz međunarodnih aktivnosti s ciljem jačanja institucionalne saradnje, privlačenja investicija i razmjene dobrih praksi u oblastima lokalne uprave, razvoja mladih i civilne zaštite.

U povratku iz Sjedinjenih Američkih Država, načelnik Čengić boravio je u Republici Turskoj, gdje je u Istanbulu održao sastanak sa Yasinom Yıldızom, načelnikom općine Bağcılar. Tokom sastanka razgovarano je o realizovanim i budućim zajedničkim aktivnostima, razvoju lokalnih zajednica, te jačanju saradnje između općina kroz konkretne projekte.

Međunarodna saradnja ostaje jedan od ključnih strateških pravaca djelovanja Općine Stari Grad Sarajevo, s ciljem osiguranja konkretnih projekata i unapređenja kvaliteta života građana. Zahvaljujući ovoj saradnji Općina je u protekle dvije godine dobila milionske iznose za projekte, te privukla višemilionske investicije u Starom Gradu.





SLOVENIJA U SARAJEVU KROZ MUZIKU, TRADICIJU I ZAJEDNIŠTVO

Festival "SI IN" – Slovenija u Sarajevu, koji se održao od 16. do 19. aprila 2026. godine, donio je bogat kulturni program i snažnu poruku povezivanja kroz umjetnost, tradiciju i zajedništvo. Događaj je organizovan u saradnji sa Ambasadom Republike Slovenije u Sarajevu, Udruženjem ARTIS Sarajevo, Općinom Stari Grad Sarajevo te Općinom Novo Sarajevo.

Centralni događaj festivala, koncert pod nazivom "Slovenija u Sarajevu", održan je 18. aprila, ispred Katedrale, gdje se okupio veliki broj učesnika i posjetilaca. U svečanoj atmosferi nastupili su predstavnici različitih slovenačkih kulturnih udruženja, koji su kroz pjesmu, ples i tradicionalne nošnje predstavili bogatstvo kulturne baštine svoje zemlje.

Tokom festivalskih dana, Stari Grad je ugostio učesnike iz svih dijelova Slovenije, koji su s ponosom predstavili svoje običaje, umjetnost i tradiciju građanima i gostima glavnog grada Bosne i Hercegovine. Raznovrstan program privukao je pažnju brojnih posjetilaca, pružajući im priliku da iz prve ruke dožive dio slovenačke kulture.



JAČANJE SARADNJE IZMEĐU OPĆINA STARI GRAD SARAJEVO I STARI GRAD BEOGRAD

Delegacija Općine Stari Grad Sarajevo prisustvovala je obilježavanju Dana pobratimske Opštine Stari Grad Beograd na poziv predsjednika Gradske opštine Radoslava Marjanovića.

Tokom boravka upriličeno je više sadržaja, a centralni događaj bila je svečana sjednica Skupštine održana u Narodno pozorište u Beogradu, gdje su prisustvovali brojni zvaničnici i gosti iz regiona.

Delegacija je također učestvovala u simboličnoj sadnji drveta prijateljstva na prostoru Kalemegdana, kao simbol prijateljskih odnosa između dvije općine. Učešće na ovom događaju bila je prilika za razmjenu iskustava i jačanje međusobne saradnje, s ciljem realizacije budućih zajedničkih projekata.



Protokol i saradnja



AMBASADORICA DRŽAVE PALESTINE POSADILA STABLO PRIJATELJSTVA NA DARIVI



U Aleji ambasadora na Darivi posađena je nova lipa, simbol mira i prijateljstva među narodima. Novoimenovana ambasadorica Države Palestine u Bosni i Hercegovini, Nj.E. Sylvia Abu Laban, zajedno s načelnikom Općine Stari Grad Irfanom Čengićem, svečano je zasadila 249. lipu u ovom jedinstvenom nizu stabala koji od 2002. godine bilježi tragove međunarodnih prijateljstava.

Aleja ambasadora, koja se proteže od Bentbaše do Darive, već više od dvije decenije okuplja predstavnike država i međunarodnih organizacija koji za svoje zemlje sade po jedno stablo lipe, kao trajnu uspomenu na mir, stabilnost i partnerstvo. Po završetku sadnje, ambasadorici je uručen certifikat o učešću u ovom projektu, te brošura sa imenima svih diplomata koji su do sada ostavili svoj trag u Aleji.

Ova posjeta bila je i prilika za održavanje sastanka u prostorijama palestinske zajednice u Starom Gradu, koji je otvoren u januaru 2025. godine. Općina Stari Grad kontinuirano njeguje dobre odnose sa palestinskom zajednicom u Bosni i Hercegovini, ali i prethodnim ambasadorom Rezeq Namoorom, a današnji susret dodatno je potvrdio opredijeljenost ka jačanju međusobne saradnje. Svaka nova lipa u Aleji ambasadora predstavlja mnogo više od stabla. Ona je simbol dugoročnih prijateljstava i trajna uspomena na međunarodnu saradnju koja Sarajevo potvrđuje kao grad otvorenosti, solidarnosti i mira. Općina Stari Grad Sarajevo ovom prilikom još jednom izražava podršku narodu Palestine, uz opredijeljenost za mir, pravdu i poštivanje osnovnih ljudskih prava.



DELEGACIJA OPĆINE STARI GRAD NA PRIJEMU KOD AMBASADORA TURSKE

Nakon iftara, delegacija Općine Stari Grad Sarajevo predvođena načelnikom Irfanom Čengićem posjetila je rezidenciju ambasadora Republike Turske u Bosni i Hercegovini Emina Aksekija, gdje je upriličen prijem uz čaj i prijateljski razgovor.

Tokom susreta razgovarano je o nastavku dobre saradnje između institucija Republike Turske i Općine Stari Grad Sarajevo, kao i o mogućnostima realizacije novih zajedničkih projekata koji će dodatno unaprijediti odnose i donijeti konkretne koristi građanima.



Protokol i saradnja



TRADICIONALNI IFTAR U STAROM GRADU OKUPIO VELIKI BROJ GRAĐANA

U dvorani Osnovne škole Edhem Mulabdić u Starom Gradu upriličen tradicionalni iftar koji je okupio oko 600 građana ove starogradske općine. Iftar, koji je već postao lijepa ramazanska tradicija, i ove godine zajednički su organizovali Općina Stari Grad Sarajevo i Općina Bağcılar iz Republike Turske.

Među prisutnima su bili građani svih generacija, a iftar je bio je prilika za druženje i jačanje prijateljskih veza između građana Starog Grada i Sarajeva sa predstavnicima turske općine Bağcılar, koja već dugi niz godina podržava različite projekte i inicijative u glavnom gradu Bosne i Hercegovine.

Međunarodna saradnja ostaje jedan od ključnih strateških pravaca djelovanja Općine Stari Grad Sarajevo, s ciljem osiguranja konkretnih projekata i unapređenja kvaliteta života građana. Zahvaljujući ovoj saradnji Općina je u protekle dvije godine dobila milionske iznose za projekte, te privukla višemilionske investicije u Starom Gradu.


Brojni sugrađani okupili su se kako bi zajedno podijelili iftarski obrok u posebnoj atmosferi mjeseca Ramazana, naglašavajući značaj očuvanja tradicije i jačanja međusobnih odnosa u zajednici.





IFTAR U SABURINOJ KUĆI: SUSRET NAČELNIKA I STAROGRADSKIH IMAMA

Općinski načelnik Irfan Čengić upriličio je iftar u Saburinoj kući za starogradske imame, u duhu zajedništva i Ramazana. Susret je iskorišten za razgovor o jačanju saradnje između lokalne zajednice i vjerskih institucija te očuvanju društvenih vrijednosti. Načelnik Čengić izrazio je zahvalnost imamima na njihovom trudu i doprinosu zajednici, uz razmjenu iskustava i ideja za buduće aktivnosti usmjerene ka jačanju zajednice.



Protokol i saradnja



IFTAR U STAROM GRADU OKUPIO BORCE I PRIJATELJE

Savez Udruženja boraca odbrambeno-oslobodilačkog rata 1992–1995 Općine Stari Grad Sarajevo i ove godine organizovao je tradicionalni iftar u Starom Gradu, okupljajući veliki broj veterana, predstavnika institucija i građana.

Događaju je prisustvovao i načelnik Općine Stari Grad Sarajevo Irfan Čengić, koji je iftario zajedno s borcima Armije Republike Bosne i Hercegovine, ljudima koji su svojim djelima branili domovinu i omogućili budućim generacijama da žive u miru. Tokom susreta naglašena je važnost očuvanja sjećanja na borce koji su dali doprinos odbrani Bosne i Hercegovine, ali i nastavka izgradnje stabilnog i sigurnog društva.





NAČELNIK ČENGIĆ POVODOM VASKRSA POSJETIO STARU PRAVOSLAVNU CRKVVU

Načelnik Općine Stari Grad Sarajevo Irfan Čengić, zajedno sa predsjedavajućim Općinskog vijeća Seidom Škaljićem i vijećnicom Selvirom Vilić, posjetio je Staru pravoslavnu crkvu na Baščaršiji, gdje je upriličeno bojenje prazničnih jaja.

„Svim našim sugrađanima koji slave ovaj blagdan upućujem iskrene čestitke, uz želju za zdravlje, mir i radost u njihovim domovima. Stari Grad je mjesto susreta različitih religija, kultura i tradicija, i upravo je to njegovo najveće bogatstvo. Posebna je vrijednost što u jednoj općini imamo dvije ovakve ljepotice, Staru pravoslavnu crkvu i Sabornu crkvu, koje svjedoče o našoj historiji, ali i zajedničkoj budućnosti“, izjavio je načelnik Čengić.



UPUĆENA ČESTITKA I POVODOM USKRSA

Svim vjernicima katoličke vjeroispovijesti upućena iskrena čestitka povodom Uskrsa, uz želju da ovaj veliki praznik provedete u miru, zdravlju i porodičnoj sreći. Neka vam uskrsni dani donesu radost, nadu i obnovu duha, te budu podsjetnik na snagu zajedništva, ljubavi i međusobnog poštovanja.



Praznici



DELEGACIJA OPĆINE STARI GRAD NA BAJRAMSKOM PRIJEMU KOD REISU-L-ULEME

Delegacija Općine Stari Grad Sarajevo, predvođena načelnikom Irfanom Čengićem, prisustvovala je tradicionalnom bajramskom prijemu upriličenom kod reisu-l-uleme Islamske zajednice u Bosni i Hercegovini, Huseina ef. Kavazovića.

Prijem je održan u zgradi Rijasetu na Kovačima, a u delegaciji su bili i predsjedavajući Općinskog vijeća Stari Grad Seid Škaljić, te vijećnici Općinskog vijeća Stari Grad Nermin Iković, Adnan Smajović, Armin Buljugić, Selvira Vilić, Alem Bakija i Muamer Mekić.

Uoči prijema, reis Kavazović je predvodio bajramsku hutbu u Gazi Husrev-begovoj džamiji u Sarajevu, nastavljajući dugogodišnju tradiciju obilježavanja jednog od najvažnijih muslimanskih praznika.



DELEGACIJA OPĆINE PRISUSTVOVALA OBILJEŽAVANJU DANA NOVOG PAZARA

Delegacija Općine Stari Grad Sarajevo boravila je u Novom Pazaru povodom svečanog obilježavanja Dana grada, čime je nastavljena dugogodišnja praksa njegovanja prijateljskih i partnerskih odnosa između ove dvije lokalne zajednice.

Tokom boravka u Novi Pazar upriličeni su susreti s predstavnicima lokalne vlasti, na kojima je potvrđena obostrana spremnost za daljnje jačanje saradnje u oblastima od zajedničkog interesa, s posebnim akcentom na povezivanje građana i razmjenu iskustava u radu lokalnih uprava.

Delegaciju su činili predsjedavajući Općinskog vijeća Stari Grad Seid Škaljić i rukovodilac Službe Općinskog vijeća Abid Šehović. Svečanostima je prisustvovao i dopredsjedavajući Gradskog vijeća Sarajeva i općinski vijećnik Emir Bićo.



UZ PODRŠKU OPĆINE STARI GRAD: POTPISAN SPORAZUM IZMEĐU CENTRA „GENERACIJA“ I FARMACEUTSKOG FAKULTETA

Predsjedavajući Općinskog vijeća Stari Grad Sarajevo, Seid Škaljić, zajedno s ministrom zdravstva Kantona Sarajevo Enisom Hasanovićem i dopredsjedavajućom Skupštine Kantona Sarajevo Jelenom Pečić, te dekanom Farmaceutskog fakulteta prof. dr. Mirzom Dedićem posjetio Centar za zdravo starenje „Generacija“.

Povod posjete bilo je potpisivanje sporazuma o saradnji između Centra i Farmaceutskog fakulteta Univerziteta u Sarajevu, uz posredstvo Općine Stari Grad. Ova saradnja imat će poseban značaj za unapređenje aktivnosti koje se provode u Centru, posebno u oblasti edukativnih radionica poput pravilne i kontrolisane upotrebe lijekova, očuvanja zdravlja i prevencije bolesti kod starije populacije.

Sporazum su potpisali predsjednik Udruženja „Generacija“ Mahir Selmanović i dekan Farmaceutskog fakulteta prof. dr. Mirza Dedić, čime je ozvaničena buduća saradnja na projektima od značaja za korisnike Centra.



Protokol i saradnja

NAČELNIK ČENGIĆ REIZABRAN ZA POTPREDSJEDNIKA SJEDNIKA NALAS-a

Načelnik Općine reizabran je za potpredsjednika NALAS-a - Mreže asocijacija lokalnih vlasti jugoistočne Evrope na 21. Generalnoj skupštini održanoj u Sibiu. Ovo priznanje potvrđuje aktivnu ulogu Općine Stari Grad u regionalnoj saradnji i jačanju lokalnih zajednica. Tokom skupštine održani su bilateralni sastanci sa predstavnicima pobratimskih općina, uključujući Mehmeda Ergüna Turana i Dušana Raičevića, s fokusom na unapređenje saradnje i realizaciju zajedničkih projekata. Općina Stari Grad nastavlja aktivno učešće u međunarodnim inicijativama radi razvoja, razmjene znanja i privlačenja investicija koje doprinose kvalitetu života građana.





STAROGRADSKI UČENICI I OPĆINA STARI GRAD ZAJEDNO OBILJEŽILI 1. MART – DAN NEZAVISNOSTI BIH

Općina Stari Grad Sarajevo, svečano je obilježila 1. mart – Dan nezavisnosti Bosne i Hercegovine, nizom prigodnih aktivnosti kojima je odana počast svim onima koji su dali živote za slobodnu i nezavisnu domovinu.

Obilježavanje je započelo intoniranjem himne Bosne i Hercegovine, nakon čega su prisutni učenjem Fatihe i minutom šutnje odali počast šehidima i poginulim borcima. Potom je upriličeno polaganje cvijeća na Centralnom spomen-obilježju borcima sa područja Općine Stari Grad. Cvijeće su položile sljedeće delegacije: Delegacija Općine Stari Grad Sarajevo, predvođena načelnikom Irfanom Čengićem, Zavod „Mjedenica“, JU OŠ „Edhem Mulabdić“, JU OŠ „Vrhbosna“, JU OŠ „Šejh Muhamed ef. Hadžijamaković“, JU OMŠ „Mladen Pozajić“, JU OŠ „Saburina“, JU OŠ „Hamdija Kreševljaković“, Bloom School Sarajevo i JU OŠ „Mula Mustafa Bašeskija“.



Važni datumi



Nakon odavanja počasti na spomen-obilježju, program je nastavljen u Domu Oružanih snaga Bosne i Hercegovine, gdje je održana centralna svečanost uz prisustvo predstavnika Općine, učenika, nastavnika, roditelja i brojnih zvanica. Svečani program otvoren je izvođenjem himne Bosne i Hercegovine u interpretaciji orkestra JU Osnovne muzičke škole „Mladen Pozajić“. Prisutnima su se obratili načelnik Općine Stari Grad Sarajevo Irfan Čengić i predsjedavajući Općinskog vijeća Seid Škaljić, ističući da je 1. mart simbol hrabrosti, zajedništva i odgovornosti svih građana Bosne i Hercegovine.

“Vi ste rođeni i odrastate u vremenu slobode. Moja generacija i generacije malo starije od mene odrastale su u vremenu rata i teškog oporavka. Zato je važno da znate – sloboda nije nešto što se podrazumijeva. Ona je izborna i sačuvana velikom žrtvom.

Naše generacije trebaju biti zahvalne generacijama naših roditelja i predaka, jer zahvaljujući njima danas imamo priliku da živimo u svojoj domovini, da sanjamo i planiramo budućnost ovdje, u Bosni i Hercegovini”, istakao je načelnik Čengić u svom govoru.

U bogatom kulturno-umjetničkom programu učestvovali su učenici JU Osnovne muzičke škole „Mladen Pozajić“, Zavoda „Mjedenica“, JU OŠ „Vrhbosna“, JU OŠ „Saburina“, JU OŠ „Šejh Muhamed-ef. Hadžijamaković“, JU OŠ „Mula Mustafa Bašeskija“, JU OŠ „Edhem Mulabdić“, JU OŠ „Hamdija Kreševljaković“ i Srednje muzičke škole.






OBILJEŽENA GODIŠNJICA ARMIIJE REPUBLIKE BOSNE I HERCEGOVINE

Obilježeno je 34 godine od osnivanja Armije Republike Bosne i Hercegovine, simbola otpora, hrabrosti i borbe za slobodu.

Formirana 15. aprila 1992. godine, u najtežim danima agresije na našu domovinu, Armija RBiH stala je u odbranu suvereniteta, teritorijalnog integriteta i dostojanstva građana Bosne i Hercegovine. Uprkos teškim okolnostima, nejednakim uslovima i brojnim izazovima, borci Armije RBiH pokazali su nesalomivu volju, hrabrost i odlučnost da odbrane ono najvrijednije – slobodu i domovinu.

Načelnik Općine Stari Grad položio je cvijeće na spomenik borcima Starog Grada, koji je izgrađen nakon 30 godina, odajući počast svima koji su dali svoj doprinos u odbrani domovine.

U ime Općine Stari Grad Sarajevo počast su odali predsjedavajući Općinskog vijeća Stari Grad Seid Škaljić, dopredsjedavajući Kerim Smalbegović i Vedad Deljković, pomoćnik Općinskog načelnika Adnan Sačirović i vijećnik Imran Hodžić.



Važni datumi



NA ŠEHIDSKOM MEZARJU KOVAČI OBILJEŽEN DAN ŠEHIDA

Učenjem Fatihe i polaganjem cvijeća na Šehidskom mezarju Kovači, delegacija Općine Stari Grad Sarajevo obilježila je Dan šehida. Ovaj dan, koji se tradicionalno obilježava drugog dana Ramazanskog bajrama, posvećen je trajnom sjećanju na hrabre borce koji su dali svoje živote braneći Bosnu i Hercegovinu.

Tim povodom, na centralnom spomen-obilježju i mezaru prvog predsjednika Predsjedništva RBiH Alije Izetbegovića položeno je cvijeće, uz odavanje počasti svim šehidima.

Uz dopredsjedavajućeg OV Kerima Smailbegovića, u delegaciji Općine Stari Grad Sarajevo bili su i pomoćnici načelnika Damir Džaferović, Emir Ibrišimović, vijećnici Općinskog vijeća Stari Grad Nermin Iković, Selvira Vilić, Merima Arnautović, Salih Išerić, te predstavnici boračkih udruženja i građani.





DAN GRADA SARAJEVA: SJEĆANJE NA SLOBODU I HEROJE

Sarajevo obilježilo 6. april – Dan grada, jedan od najznačajnijih datuma u njegovoj historiji. Na ovaj dan 1945. godine glavni grad Bosne i Hercegovine oslobođen je od fašističke okupacije. Tim povodom delegacija Općine Stari Grad Sarajevo prisustvovala je obilježavanju ovog značajnog datuma, posjetivši spomen-obilježja i odajući počast svim onima koji su dali svoje živote za slobodu grada. Delegaciju Općine Stari Grad Sarajevo činili su: dopredsjedavajući Općinskog vijeća Stari Grad Sarajevo, Vedad Deljković i Kerim Smailbegović, pomoćnik Općinskog načelnika, Adnan Šaćirović, te vijećnici Općinskog vijeća Stari Grad, Srđan Simonović, Iman Čoko, Željko Ler, Salih Išerić, Zlatan Ljuhar, Sabahudin Arapović i Muamer Mekić.

U VIJEĆNICI SVEČANO OBILJEŽEN DAN GRADA SARAJEVA

Povodom Dana grada Sarajeva u Vijećnici je održana svečana sjednica Gradskog vijeća Sarajeva, kojoj su prisustvovali brojni zvaničnici i gosti. Obilježavanje 6. aprila, jednog od najvažnijih datuma u historiji Sarajeva, proteklo je u duhu podsjećanja na vrijednosti slobode, solidarnosti i otpora koje ovaj grad njeguje.

Na svečanoj sjednici, dodijeljena su najveća priznanja Grada, ovogodišnja pojedinačna i kolektivna Šestoaprilaska nagrada, kao i Plakete i Diplome. Pojedinačna Šestoaprilaska nagrada za 2026. dodijeljena je Elviru Karaliću, osnivaču humanitarnog udruženja Pomozi.ba, a kolektivna Udruženju Obala Art Centar Sarajevo za značajna ostvarenja u oblasti kulture i umjetnosti.



Važni datumi



6. APRIL – DAN POLICIJE KANTONA SARAJEVO

Povodom Dana policije, 6. aprila, upućena je čestitka:

Hvala vam na predanom radu, profesionalizmu i hrabrosti koju svakodnevno pokazujete u zaštiti sigurnosti naših građana. Vaša posvećenost, odgovornost i spremnost da djelujete u najizazovnijim trenucima čine temelj sigurnog, stabilnog i uređenog društva. Vaša služba nije samo posao, to je poziv koji zahtijeva čast, integritet i nesebičnu posvećenost.

Uz iskrene želje za dobro zdravlje, uspjeh u radu i ličnu sreću, od srca vam čestitamo vaš dan.



OBILJEŽENA 81. GODIŠNJICA OSLOBOĐENJA SARAJEVA OD FAŠISTA

Udruženje antifašista i boraca Narodnooslobodilačkog rata Stari Grad prigodnim programom obilježilo 81. godišnjicu oslobođenja Sarajeva od fašističkih okupatora. Ova značajna godišnjica podsjetila je na trenutak kada su oslobodilačke antifašističke snage 16. muslimanske brigade ušle u grad kroz Višegradsku kapiju, prešle Vratnik i nastavile put prema zgradi Vijećnice, čime je započelo oslobođenje Sarajeva.





NAČELNIK ZATVORIO 19. MEĐUNARODNI KOŠARKAŠKI TURNIR „6. APRIL“ U SKENDERIJI

Načelnik Irfan Čengić svečano je zatvorio 19. Međunarodni šestoapriliški turnir povodom Dana grada Sarajeva, koji je održan od 17. do 19. aprila u dvorani Skenderija.

U okviru ovog prestižnog sportskog događaja odigrana je i završnica Regionalne IMB lige u pionirskom uzrastu (U14), na kojoj je nastupilo 16 renomiranih ekipa iz regiona. Tokom trodnevnog programa publika je imala priliku uživati u vrhunskim utakmicama, ali i pratećim sadržajima, uključujući ALL STAR susret između selekcija Istoka i Zapada, kao i takmičenja u šutiranju. Načelnik Čengić je u svom obraćanju istakao značaj kontinuirane podrške mladima i sportu, naglašavajući da ovakvi turniri doprinose razvoju talenata, jačanju sportskog duha i povezivanju mladih iz cijelog regiona.



STARI GRAD BIO DOMAĆIN DRŽAVNOG FINALA RED BULL FOUR 2 SCORE TURNIRA

Državno finale Red Bull Four 2 Score fudbalskog turnira 4 na 4 održano je danas na Trgu Prve brigade policije (plato ispred Vijećnice), gdje su brojni posjetioци imali priliku uživati u dinamičnom i atraktivnom takmičenju.

Projekat je podržala Općina Stari Grad Sarajevo, a događaju je prisustvovao i načelnik Općine Irfan Čengić, koji je ovom prilikom istakao značaj promocije sporta i zdravih stilova života među mladima, kao i važnost organizacije ovakvih događaja u srcu Sarajeva.

Riječ je o jedinstvenom formatu malog fudbala u kojem golovi postignuti u prvju i posljednjoj minuti utakmice vrijede dvostruko, što je dodatno doprinijelo neizvjesnosti i uzbuđenju na terenu. Najuspješnije ekipe izborile su plasman na svjetsko finale, gdje će predstavljati Bosnu i Hercegovinu.

